

LOVAČKO DRUŠTVO „JELEN“ GRADAČAC GRADAČAC



Na osnovu člana 53. Zakona o lovstvu (Sl. Novine FBiH br:4/06), a u vezi s odredbama Pravilnika o uslovima gospodarenja lovištem (Sl. Novine FBiH br:63/06), Pravilnika o vrsti i broju pasa za lov na pojedine vrste divljači u određenim područjima (Sl. Novine FBiH br:5/08), Pravilnika o obrascu, sadržaju, načinu i postupku izdavanja potvrda i trofejnog lista za trofeje odstrijeljene divljači i Pravilnika o obrascu potvrde o porijeklu divljači i njenih dijelova i uslovima pod kojim se može vršiti prepariranje divljači i držanje trofeja javno izloženih u objektima kao i upotrebi mesa divljači u ugostiteljskim objektima (Sl. Novine FBiH br:63/08), te odredaba člana 30. t. 2. Statuta Lovačkog društva «Jelen» Gradačac br: 01-192/09, Skupština LD «Jelen» Gradačac na sjednici održanoj dana 24.12.2009. godine, donosi

PRAVILNIK O USLOVIMA VRŠENJA LOVA I KORIŠTENJU ULOVA

OPŠTE ODREDBE

Član 1.

Ovim Pravilnikom bliže se određuje ko može i pod kojim uslovima vršiti lov divljači u lovištu kojim gazduje Lovačko društvo «Jelen» Gradačac (u daljem tekstu «Udruženje»), učešće lovaca u korištenju ulova, postupak sa trofejima odstrijeljene divljači, uslovi pod kojima se može vršiti prepariranje divljači i izlaganje trofeja na javnim mjestima, izdavanje potvrde o porijeklu divljači, mjere sigurnosti i ograničenja u lovu i naknada prouzrokovane štete.

Član 2.

Ulovljena ili uginula divljač i njeni dijelovi (trofeji i dr.) pripadaju korisniku lovišta (Udruženju) i mogu se koristiti uz naknadu po tržišnim cijenama ulovljene divljači i njenih dijelova (Cjenovnik) korisnika lovišta (Udruženja).

PRAVO LOVA

Član 3.

U lovištu, divljač mogu loviti i koristiti njene dijelove:

1. Lovci članovi Udruženja;
2. Radnici Stručne službe korisnika lovišta (Udruženja) i Saveza;
3. Lovci – turisti;
4. Gosti Udruženja i Saveza.

Osobe iz tačke 2. i 4. ovog člana koriste ulovljenu divljač i njene dijelove pod istim uvjetima kao i članovi Udruženja, stim što naknadu za ulovljenu divljač može platiti njihov domaćin ili treće lice. Radnici Stručne službe kada vrše uzgojno selektivni i sanitarni odstrel ne plaćaju naknadu za ulovljenu divljač.

Član 4.

Status lovca – člana Udruženja iz tačke 1. člana 3. ovog Pravilnika ima onaj član Udruženja koji se vodi na evidenciji članova Udruženja, koji je izmirio sve obaveze prema Udruženju propisane Statutom Udruženja i drugim općim aktima Udruženja, te kome odlukom Udruženja nije izrečena mjera zabrane lova za godinu u kojoj se lov vrši.

Status radnika Stručne službe Udruženja ima stručni radnik za provođenje lovno privredne osnove, lovovođa Udruženja, lovovođe Revira, lovočuvari, lovočuvari volonteri i administrativni radnik.

Status radnika Stručne službe Saveza ima osoba određena općim aktom Saveza.

Status lovca – turista ima osoba koja nije član Udruženja a kojoj je u skladu s ovim Pravilnikom omogućen lov u turističke svrhe.

Status gosta Udruženja i Saveza imaju lovci članovi drugih udruženja i Saveza na teritoriji Bosne i Hercegovine.

Član 5.

Lovci – članovi Udruženja mogu loviti divljač u lovištu, kada ispune uslove utvrđene Zakonom o lovstvu, Statutom Saveza, Statutom Udruženja i drugim općim aktima Udruženja.

Lov i prava iz lova ostvaruju članovi Udruženja prevashodno u lovnom reviru u kojem izvršavaju svoje obaveze po odluci Predsjedništva Udruženja, kao i u drugim lovnim revirima u lovištu Udruženja.

Lovci turisti mogu loviti na osnovu ugovora zaključenog između Udruženja i turističke agencije – posrednika ili privrednog društva koje ispunjava uslove iz zakona o lovstvu ili neposredno u slučaju da su državljani BiH.

VRSTE LOVA

Član 6.

U lovištu Udruženja se lovi:

1. Uzgojno – selektivnim odstrelom;
2. Sanitarnim odstrelom;

3. Redovnim i trofejnim odstrelom;
4. Odstrelom na osnovu člana 14, 19, 56, 57. i 59. Zakona o lovstvu (lov uz odobrenje).
5. Redukcionim odstrelom.

Redovni i trofejni odstrel krupne i sitne divljači vrše lovci-turisti i članovi udruženja, a izuzetno i gosti uz prethodnu odluku Predsjedništva Udruženja.

Uzgojno selektivni i sanitarni odstrel vrše radnici Stručne službe Udruženja i lovci turisti ukoliko za to imaju interes.

Uzgojno selektivni odstrel lovci turisti i članovi udruženja vrše uvijek u pratnji radnika Stručne službe Udruženja, odnosno lica ovlaštenog od strane Predsjedništva Udruženja.

Lov upotrebom sokola i drugih ptica grabljivica nije dozvoljen.

Član 7.

U lovištu se može organizovati pojedinačni i grupni lov, zavisno o vrsti divljači koja se lovi i broju lovaca.

1. Pojedinačnim lovom love se slijedeće vrste divljači: jelen lopatar, srna i divlja svinja.

Pojedinačni lov se obavlja dočekom na zemlji, dočekom na čeki, vabljenjem, vrebanjem, šuljanjem, mamljenjem i zapregom, uvijek uz pratnju stručnog pratioca.

2. Grupnim lovom se love slijedeće vrste divljači: divlja svinja, zec, fazan, poljska jarebica, jarebica kamenjarka, šumska šljuka, divlja patka, prepelica, i druge vrste divljači van režima zaštite.

Grupni lov se obavlja prigonom, pogonom i kružnim lovom.

U grupnom lovu je dozvoljena upotreba lovačkih pasa u skladu sa odredbama Zakona o lovstvu i Pravilnika o vrsti i broju pasa za lov na pojedine vrste divljači u određenim područjima (Sl. Novine FBiH br:5/08).

U grupnom lovu sudjeluje najmanje 3 (tri) lovaca. U zavisnosti od vrste divljači, Operativnim kalendarom lova na pojedinu vrstu divljači odredit će se i veći broj članova grupe na prijedlog Predsjedništva, a što usvaja Skupština LD-a.

Divljač izvan režima zaštite se lovi u pojedinačnom i u grupnom lovu.

ORGANIZACIJA I NAČIN LOVA

Član 8.

Krupna divljač se lovi na osnovu Dozvole za lov krupne divljači izdate na propisanom obrascu, a divlja svinja i sitna divljač na osnovu Dozvole koja glasi na ime vođe grupe lovaca.

Dozvolu za lov krupne divljači izdaje Udruženje (glavni lovovođa Udruženja po ovlaštenju Predsjedništva Udruženja), a dozvolu za lov sitne divljači izdaje predsjednik organizacionom dijela za lovni revir u kojem svoje aktivnosti ostvaruje organizacioni dio Udruženja.

Dozvola za lov se izdaje najmanje na 24 sata prije početka lova.

Član 9.

Dozvola za lov se može izdati samo na one vrste divljači koje su predviđene u godišnjem planu gazdovanja lovištem za tekuću lovnu godinu i u planiranom broju (obimu).

Ulovljena divljač i njeni dijelovi mogu se iznijeti iz lovišta samo uz potvrdu koju na propisanom obrascu izdaje pratilac lovca u lovu na krupnu divljač, a vođa grupe lovaca ili lovovođa u lovu na divlje svinje i sitnu divljač.

Potvrda za sitnu divljač i divlju svinju može se dati i vođi grupe lovaca za cijelu grupu ako zajedno izlaze iz lovišta ili idu do mjesta stanovanja.

Član 10.

Pratilac lovca i vođa grupe lovaca dužan je u roku od 48 sati, odnosno u roku kojeg odredi Predsjedništvo Udruženja, po završetku lova, dostaviti Stručnoj službi Udruženja Zapisnik o izvršenom lovu i Izvještaj o izvršenom lovu na drugoj strani dozvole za lov, odnosno drugom dijelu dozvole za lov sa unesenim svim podacima predviđenim u obrascu.

Grupi lovaca, odnosno lovcu iz grupe lovaca za koju nije dostavljen izvještaj u roku neće se izdati dozvola za lov u slijedećem lovnom danu (nedjelji), a vođa grupe – pratilac čini težu povredu discipline i za nju Predsjedništvo Udruženja može tom licu uskratiti pravo vođe grupe – odnosno pratioca.

Član 11.

Planom gazdovanja se utvrđuju vrste i broj divljači koja se može odstrijeliti u lovištu, a Operativnim kalendarom aktivnosti se određuje datum i vrijeme početka i završetka lova kao i zborna mjesta lovaca za svaki revir.

Lovci članovi udruženja i gosti u lovu u lov polaze sa zbornog mjesta i iz lova se vraćaju na zbornu mjesto.

Zborna mjesta za svaki revir u zavisnosti od broja grupa lovaca određuje Predsjedništvo Udruženja, na prijedlog Koordinatora Revira, najkasnije 15 dana prije početka lovne sezone i sa njima upoznaje sve članove Udruženja.

Član 12.

Na zbornom mjestu, pratilac odnosno vođa grupe lovaca je dužan unijeti imena lovaca koji u lovu sudjeluju u dozvolu za lov i da provjeri ispravnost oružja i opreme za lov, lovnu kartu, člansku kartu, oružni list i dokumente za pse ukoliko se vode u lov.

Obavezno je da upozna lovce sa vrstom divljači koja se lovi, načinom lova, vremenom završetka lova i mjerama sigurnosti kojih su svi lovci dužni se pridržavati.

Lovci koji ne ispunjavaju uslove iz stava 1. ovog člana i lovci koji su pod uticajem alkohola ne mogu loviti tog dana.

UPOTREBA LOVAČKIH PASA

Član 13.

U lovu se mogu upotrebljavati lovački psi koji su registrovani kod kinoloških saveza u Federaciji BiH i imaju pozitivnu ocjenu sa Smotre za ocjenu oblika i položen ispit urođenih osobina po pravilnicima kinoloških saveza.

Izuzetno od odredaba prethodnog stava, radi uvježbavanja za obavljanje određenih radnji u lovu, mladi lovački psi mogu sudjelovati u lovu i bez položenog ispita prirođenih osobina, do navršenih 18 mjeseci života.

Član 14.

Čistokrvni lovački psi, u smislu ovog Pravilnika i Pravilnika o vrsti i broju pasa za lov na pojedine vrste divljači u određenim područjima (Sl. Novine FBiH br:5/08), jesu svi psi koji udovoljavaju potrebama za lov i posjeduju zvanični Rodovnik izdat od jedne od članica Međunarodne kinološke federacije (FCI).

Član 15.

Lov sitne divljači čije tehnike lova zahtijevaju lovačkog psa ne može se započeti i obavljati bez psa u skladu sa članom 13. i 14. ovog Pravilnika.

Skupni lov divljači čije tehnike lova zahtijevaju lovačkog psa ne može se započeti i obavljati ako u njemu ne sudjeluje najmanje jedan lovački pas na pet sudionika.

Član 16.

Sitna divljač se lovi lovačkim psima ptičarima, dizačima i donosačima divljači, terijerima i jazavčarima koji imaju položen ispit urođenih osobina.

Lovačkim psima terijerima, jazavčarima, goničima i krvosljednicima, s položenim ispitom urođenih osobina dopušteno je loviti divlju svinju.

Lovačkim psima goničima s položenim ispitom urođenih osobina dopušteno je loviti divlju svinju, zeca, lisicu, divlju mačku, kunu i tvora.

Terijerima i jazavčarima s položenim ispitom prirođenih osobina dopušten je lov jamarenjem uz iskapanje.

Član 17.

Nije dopušteno upotrebljavati lovačke pse noću, osim kod rada na krvnom tragu i lova šljuka i močvarica na preletu.

Kao noćno vrijeme drži se razdoblje od dva sata nakon zalaska sunca do dva sata prije izlaska sunca.

Član 18.

Lovački psi goniči mogu se upotrebljavati u lovištu samo nakon dobivene dozvole korisnika lovišta. Sa goničima nije dopušteno loviti od 5. januara do 1. oktobra.

Član 19.

Ispit urođenih osobina kao i ispit u radu na krvnom tragu za lovačke pse polaže se na osnovu pravilnika kinoloških saveza, u skladu s propisima Međunarodne kinološke federacije. Na osnovu položenog ispita lovačkog psa izdaju se uvjerenja u skladu s propisima Međunarodne kinološke federacije.

NAKNADA ZA ULOVLJENU DIVLJAČ

Član 20.

Lovac – član Udruženja, plaća za upotrebu divljači i njenih dijelova:

- za visoku divljač 40 % od tržišne vrijednosti,
- za nisku divljač 25 % od tržišne vrijednosti

Strani i domaći lovci turisti, za upotrebu divljači i njenih dijelova i drugih usluga plaćaju punu tržišnu cijenu.

Cjenovnik odstrela i upotrebe divljači te drugih usluga u lovištu na bazi tržišne vrijednosti donosi federalni ministar.

Lovac – član Udruženja, naknadu za ulovljenu divljač plaća po izvršenju lova ili u vidu akontacije prilikom uplate članarine.

Uplaćena akontacija za lov divljači obračunava se po završetku sezone lova određene vrste divljači, a najkasnije do donošenja godišnjeg plana gazdovanja lovištem za narednu lovnu godinu.

Član 21.

Akontacija za lov divljači posebno se evidentira u knjigovodstvu i vodi na odvojenoj stavki knjigovodstvenog konta i iskazuje u godišnjem planu gospodarenja lovištem u dijelu prihodi – rashodi, a na kraju lovne godine obračunava se kao naknada za ulovljenu divljač.

Član 22.

Lovcu – članu Udruženja koji ne izmiri svoje obaveze nastale lovom i korištenjem divljači i njenih dijelova u utvrđenim rokovima prestaje članstvo u Udruženju, a potraživanje Udruženja će se naplatiti sudskim putem.

TROFEJI I PREPARIRANJE DIVLJAČI

Član 23.

Trofejni list je isprava o porijeklu, vlasništvu i ocjeni trofeja odstriljene divljači navedene u članu 64. Zakona o lovstvu, koju izdaje Udruženje.

Vrijednost trofeja utvrđuje Komisija na osnovu standarda propisanih od strane Međunarodnog savjeta za lovstvo i očuvanje divljači (CIC).

Član 24.

Obrazac trofejnog lista štampan je u skladu s odredbama člana 3. Pravilnika o obrascu, sadržaju, načinu i postupku izdavanja potvrda i trofejnog lista za trofeje odstriljenjene divljači (Sl. Novine FBiH br:63/08).

Trofejni list se radi u dva istovjetna primjerka, od kojih se original predaje lovcu a drugi ostaje u arhivi Udruženja.

Za trofeje koji su u kategoriji bronzane, srebrne ili zlatne medalje, rade se fotokopije trofejnih listova i dostavljaju Savezu radi uvođenja u Banku podataka vrijednih trofeja.

Član 25.

Pod prepariranjem divljači i njenih dijelova podrazumijeva se dermoplastična obrada cijelih primjeraka divljači ili njenih dijelova, štavljenje i obrada krzna divljači te obrada i montaža trofeja divljači.

Divljač i dijelove divljači namijenjene za prepariranje mora pratiti potvrda (propratnica), i trofejni list, koji su izdani od strane korisnika lovišta gdje je divljač odstrijeljena.

Propratnica za divljač štampa se prema odredbama člana 4. Pravilnika o obrascu potvrde o porijeklu divljači i njenih dijelova i uslovima pod kojim se može vršiti prepariranje divljači i držanje trofeja javno izloženih u objektima kao i upotrebi mesa divljači u ugostiteljskim objektima (Sl. Novine FBiH br:63/08).

Član 26.

Trofeji divljači mogu se izlagati u javnim objektima (ustanove, poslovni prostori, društvene prostorije, ugostiteljski objekti), samo ako imaju potvrdu, odnosno trofejni list.

Javno izloženi trofeji moraju biti pravilno obrađeni i uredno održavani.

Član 27.

Zabranjeno je javno izlaganje dermoplastičnih preparata ptica i sisavaca korisnih za poljoprivredu i šumarstvo, kao i svih vrsta divljači koje su odredbama Zakona o lovstvu trajno zaštićene.

MJERE SIGURNOSTI I OGRANIČENJA U LOVU

Član 28.

Dužnost organizatora lova je da upozna sve sudionike u lovu sa pravilima sigurnosti u lovu.

Pravila sigurnosti u lovu su sljedeća:

1. Divljač je dozvoljeno loviti lovačkim oružjem i lovačkom municijom;
2. Oružjem se mora rukovati oprezno i odgovorno;
3. Prilikom odlaska do mjesta lova, prelaska na drugo mjesto, kratkog prestanka lova, boravka u zatvorenim prostorima, puške se moraju isprazniti odnosno prelomiti;
4. Puška se puni okrenutih leđa sudionicima lova, tako da se cijev drži koso, usmjerena cijev ili nadolje ili nagore;
5. Cijev puške se nikad ne smije uperiti prema drugom lovcu;
6. Nije dozvoljeno pucati na nisko leteću divljač ili na divljač koja se kreće u pravcu drugih lovaca i kada se oni time ugrožavaju;
7. Nije dozvoljeno pucati na vodu, led ili smrznuto zemljište u pravcu drugih lovaca;
8. Prije početka lova svakog lovca upoznati sa mjestima susjednih lovaca i upozoriti ih na zabranu pucanja u određenim pravcima;
9. U grupnom lovu, divljač se ne smije pratiti sa uperenom puškom, sve dok se ne prođe crta postavljenih lovaca;
10. Ubrzač okidanja u grupnom lovu se ne smije koristiti;
11. Nije dozvoljeno divljač osmatrati preko optičkog nišana na pušci;
12. Prilikom nošenja oružja ruka se ne smije držati na ustima cijevi ili na obaraču;
13. Poslije pada puške na zemlju ili u snijeg, odnosno podizanja puške, moraju se pregledati usta cijevi radi otklanjanja eventualnih začepjenja;
14. Mjesto na koje je lovac raspoređen ne smije se napuštati u vrijeme lova bez odobrenja stručnog pratioca ili vođe grupe lovaca do završetka lova;
15. Prilikom sudjelovanja u kružnom lovu i u prigonu, puška se mora držati u položaju koso dolje ili gore;
16. Sudionike u lovu, prekršiioce pravila iz stava 1. i 2. ovog člana, stručni pratilac ili vođa grupe lovaca će isključiti iz lova.

Član 29.

Nije dozvoljen lov divljači:

1. U vrijeme kad je vidljivost znatno smanjena (vidljivost manja od 150 m), lošeg vremena (usljed magle, vijavice, jake kiše i snijega, jakog vjetra i sl.), hemijskog, biološkog i radioaktivnog zagađenja, ratnog djelovanja na površinama gdje je ustanovljeno lovište;
2. Noću, dva sata prije izlaska i dva sata poslije zalaska sunca, osim divljih svinja i vuka u noći sa mjesečinom, dočekom sa čeke;
3. Zabranjeno je loviti divljač, osim u svrhu spašavanja, u slijedećim uslovima:
 - a) kada je ugrožena poplavom;
 - b) kada je ugrožena požarom;
 - c) kada je ugrožena visokim snijegom (visina snijega iznad 40 cm);
 - d) kada je ugrožena dugotrajnim sušnim razdobljem (razdoblje duže od 60 dana bez kiše).

Zabranjeno je obavljanje lova na pojedine vrste divljači kada lov može ugroziti zdravlje ljudi, stoke, kao i druge životinjske vrste.

Član 30.

Lovostajem zaštićena divljač i divljač izvan režima zaštite može se odstrijeliti samo lovačkim oružjem i lovačkom municijom odgovarajućeg punjenja u skladu s odredbama Zakona o lovstvu.

Član 31.

Divljač izvan režima zaštite, psi i mačke koji se bez kontrole i bez odobrenja korisnika lovišta kreću po lovištu, love se u organizovanim akcijama i prilikom lova na druge vrste divljači.

Lovac član udruženja je obavezan svake lovne godine odstrijeliti određeni broj divljači izvan režima zaštite i pasa i mačaka koji se kreću lovištem bez kontrole valsnika ili odobrenja korisnika lovišta u vrijednosti koju odredi Predsjedništvo Udruženja.

Vrijednost pojedinačnog poena utvrđuje Predsjedništvo Udruženja i to za svaku lovnu godinu u godišnjem planu gazdovanja lovištem.

Lovac koji ne ispuni obavezu iz prethodnog stava ovog člana, dužan je istu platiti po cijeni koju utvrdi Predsjedništvo Udruženja i to do kraja tekuće lovne godine.

Član 32.

Objekte u lovištu u toku izvršenja lova koriste sva lica koja imaju dozvolu za lov izdatu od strane Udruženja ili Saveza, isključivo u funkciji za koju su predviđeni i uz naknadu predviđenu cjenovnikom kojeg donosi federalni ministar.

NAKNADA ŠTETE

Član 33.

LD kao korisnik lovišta je dužno preduzimati mjere za sprečavanje šteta koju divljač može učiniti imovini ili ljudima na zemljištu i vodi na kojima se nalazi lovište (održavanje broja divljači prema kapacitetu lovišta, osiguranje prehrane u lovištu, postavljanje čuvara i dr.)

Vlasnici zemljišta i stoke, odnosno korisnici zemljišta na kojem je osnovano lovište dužni su na zemljištu, objektima gdje stoka boravi i opremi koja se koristi u obradi zemlje preduzimati uobičajene mjere za sprečavanje šteta od divljači i na divljači (učinkovitom ogradom, električnim pastirom, postavljanjem plašila, zaštitom mladih sadnica omotavanjem ili premazivanjem, ispašom stoke sa pastirom na površinama dozvoljenim za ispašu, postavljanjem plašila na kosačice i kombajne, sudjelovanjem u organizovanom progonu i sl.).

Mjere iz stava 2. ovog člana propisuje kantonalni ministar.

Član 34

Za štetu koju počini lovostajem zaštićena divljač u lovištu LD, odgovorno je LD, ukoliko je oštećeni poduzeo propisane mjere zaštite.

LD je dužno finasijskim planom osigurati sredstva za naknadu štete koju učini divljač kojom gospodari LD i koju učini LD svojom djelatnošću.

Za slučaj spora nadležan je redovni sud.

Član 35

Za štetu koju prilikom lova divljači učine lovci i njihovi pomoćnici, odgovorno je LD, a LD ima pravo regresa od lovaca odnosno njihovih pomoćnika.

Član 36

Fizička ili pravna lica koja odstrijele, ili nanesu štetu divljači bespravnom lovom, ili na drugi nezakonit način, dužni su LD nadoknaditi štetu prema odštetnom cjenovniku kojeg donosi federalni ministar.

U slučaju spora određuje se nadležnost suda prema mjestu nastanka štete.

Član 37

Prijava o pričinjenoj šteti od divljači podnosi se kantonalnom ministarstvu odmah, a najkasnije u roku od 3 dana od dana kada je nastala šteta.

Kantonalno ministarstvo dužno je odmah, a najkasnije tri dana po prijemu prijave štete odrediti komisiju za utvrđivanje uzroka štete i procjenu njene vrijednosti.

Komisija je dužna odmah izvršiti uviđaj i o svom radu sačiniti zapisnik. Na uviđaj komisija poziva oštećenog i predstavnika LD.

Član 38

Po prijemu zapisnika iz stava 3. Člana 37. Ovog pravilnika, kantonalno ministarstvo će pokušati sporazumno utvrditi štetu između oštećenog i organa odgovornog za nadoknadu štete.

Ukoliko se ne postigne sporazum, oštećeni se upućuje na ostvarivanje svojih prava putem nadležnog suda.

PRELAZNE I ZAVRŠNE ODREDBE

Član 39.

Ovaj Pravilnik stupa na snagu danom donošenja od strane Skupštine Udruženja, a primjenjuje se prvog narednog dana od dana objave na oglasnoj ploči Udruženja.

Član 40.

Danom stupanja na snagu ovog Pravilnika prestaje da važi raniji Pravilnik o uslovima vršenja lova i korištenja ulova.

Broj: 01-192/09

Gradačac, 24.12.2009. godine.

VD Predsjednik LD-a:

Irfan Muftić